

四庫全書

史部

欽定四庫全書

欽定續通志卷六十二

元紀 六

成宗

成宗皇帝諱特穆爾世祖之孫太子珍戩第三子也母
鴻吉哩氏至元二十二年太子薨二十五年世祖命帝
討叛王哈坦削平遼左諸部三十年受皇太子寶撫軍
北邊明年甲午春正月世祖崩諸王大臣遣使如軍中

告哀夏四月壬午帝至上都左右部諸王畢會先是御

史中丞崔彧得玉璽于故臣之家其文曰受命于天既

壽永昌上之帝母鴻吉哩氏至是手授于帝

按續通鑑綱目時穆

呼哩曾孫碩迪已死而貧其妻出玉璽一驚之或以告御史中丞崔彧召秘書監丞楊桓辨其文曰受命于天既壽永昌此歷代傳國璽也遂獻之故太子妃鴻吉哩氏妃以通示羣臣丞相以下次第上壽慶曰神寶之出此天意屬于皇太孫也乃遣右丞張九思齎授之所載較本紀為詳伏讀通鑑輯覽

御批秦璽已為煨燼昔人言之甚詳崔彧此舉或以皇孫尚在北邊恐上都宗室諸臣起滋異說欲假此以神道設教耳不然穆呼哩為元代世臣既有此璽安敢久匿不獻直待身後家笥出驚耶

聖訓

煌煌允足訂訛
徵信謹錄識之

甲午即皇帝位大赦除大都上都兩路

差稅一年其餘減丁地稅糧十之三追尊皇考曰皇帝

尊母元妃曰皇太后庚子遣禮部侍郎李衍兵部郎中

蕭泰登齋詔使安南己酉雲南行省以所定路府州縣

來上上路二下路十一下州四十九中縣一下縣五十

以金齒歸附官阿魯為孟定路總管五月乙亥以扎實

知樞密院事戊寅以阿爾婁為太師己延為太傅伊徹

察喇為太保六月庚辰朔日有食之壬辰以特穆爾復

為平章政事以甘肅等處米價踴貴詔禁釀酒乙未以世祖皇后裕宗諡號播告天下免所在本年色銀俸鈔及內郡地稅江淮以南夏稅之半己亥以乳保勞封完顏巴延為冀國公妻何氏為冀國夫人辛丑浙西道提刑按察使鴻吉勒岱鄂爾和受賂遇赦免復以為河西隴北道肅政廉訪使宋史家鉉翁安置河間年踰八十賜衣服遣還其家戊申以策陵巴鄂爾嘉勒為帝師賜玉印秋七月壬子禁內外諸司減官吏俸為宴飲費壬

戊詔中外崇奉孔子戊辰行樞密院頁特密實程鵬飛
各加平章政事辛未令右丞阿里執政如故癸未以陝
西行省平章博果密為中書平章政事甲戌立隨路民
匠打捕鷹房納綿等戶總管府詔招諭暹國王敢木丁
來朝或有故則令其子弟及陪臣入質詔阿爾婁守北
邊八月戊子初祀社稷用堂上樂歲以為常己丑以大
都留守段貞平章政事范文虎監浚通惠河令軍士復
濬浙西太湖澱山湖溝港立新河運糧千戶所九月壬

子聖誕節帝駐蹕三部落受諸王百官賀甲寅口授諸王傳昂哈布哈為丞相庚申以和囉羅及納顏之黨七百餘人隸同知樞密院事布琳濟達習水戰乙亥遣托噶特穆爾等使閣藍冬十月戊寅車駕還大都辛巳令江南佃民當輸田主者如所蠲今歲田租十之三壬午有事于太廟乙未金齒新附孟愛甸酋長遣其子來朝即其地立軍民總管府辛丑帝諭右丞阿里參政梁德珪曰中書職務卿等皆懷怠心又不約束吏曹使選人

留滯僧格雖姦邪然僚屬憚其威政事無不立決卿等
其約束曹屬有不事事者笞之仍以朕意諭右丞相諤
勒哲壬寅緬國遣使貢馴象十一月庚戌詔京師犯
賊罪者三百人事無疑者准世祖所定十三等例決之
壬子詔以軍民不相統壹罷湖廣江西行樞密院併入
行省乙卯令河西僧人依舊助役丁巳以巴延徹爾參
議中書省事罷呼雅克齊屯田總管府罷宣政院所刻
河西藏經板甲子詔禁作姦犯科者以湖南道宣慰司

何偉為中書參知政事罷海北海南市舶提舉司癸酉
詔改明年為元貞元年十二月丙戌罷遼河等處工匠
正副達嚕噶齊戌戌禁侵擾農桑者庚子選各衛精兵
千人命巴喇罕岱爾等將之戌和琳聽太師阿爾婁節
度三年而更用帝師奏釋京師大辟三十人杖以下百
人是月太傅知樞密院巴延卒

元貞元年春正月癸丑以太僕卿濟爾噶朗為御史大
夫壬戌以雲南行省左丞楊炎龍為中書左丞乙丑以

亦奚不薛復隸雲南行省以行樞密院既罷賜中書省
長官虎符領其軍庚午以江浙行省平章阿喇卜丹為
參知政事壬申立北庭都元帥府以平章政事赫伯為
都元帥江浙行省右丞色埒默為副都元帥立察遜塔
拉都元帥府以根敦扎卜為都元帥罷瓜沙等州屯田
二月丁丑翰林學士承旨留夢炎告老壬午罷江南茶
稅以其數三千錠添入江西權茶都轉運司歲額戊子
思州田曷刺不花雲南夷卜木四川洞主查閭王金齒

帶梅混冬等來見丁酉車駕如上都癸卯以工部尚書兼諸路金玉人匠總管府達魯噶齊呂天麟為中書參知政事立雲州銀場都提舉司三月壬子禁來朝官斂所屬俸戊午罷福建銀場提舉司以東作方殷罷諸不急營造丙寅增置蒙古學正以各道肅政廉訪司領之夏四月庚寅封乳母楊氏為趙國安冀夫人癸巳以同知烏撒烏蒙等處宣慰使司事雅克諾木假兵部尚書佩虎符使馬答兒的陰閏月丙午為皇太后建佛寺于

五臺山以前工部尚書龔濟為將作院使領工部事燕
南河北道肅政廉訪使宋德柔為工部尚書董其役以
大都保定真定平陽太原大同河間大名順德廣平十
路應其所需甲寅立舍哩招討使司己未罷打捕鷹房
總管府及司籍周用薄斂等庫五月戊寅命敏珠爾丹
何榮祖等釐正選法庚辰詔各省止存儒學提舉司一
餘悉罷之升江南諸縣為州以戶為差戶四萬五萬者
為下州五萬至十萬者為中州下州官五員中州六員

凡為中州二十八下州十五又以連州戶不及額降路
為州辛巳罷行大司農司加平章政事敏珠爾丹為平
章軍國重事中書左丞議中書省事何榮祖為昭文館
大學士與中書省事甲申詔免五月以前逋欠錢糧丙
申以巴延子滿達勒為簽書樞密院事六月乙卯以江
西諸郡水災賑之仍弛江南湖泊之禁敕凡上封事者
命中書省發緘視之然後以聞癸亥立蒙古軍都元帥
府于西川徑隸樞密院庚午立西域衛親軍都指揮使

司秋七月乙亥詔江南地稅輸鈔已卯詔申飭中外有
儒吏兼通者各路舉之廉訪司每道歲貢二人省臺委
官立法考試壬寅詔易江南諸路天慶觀為玄妙觀毀
所奉宋太祖神主八月己巳以駙馬諾海知樞密院事
九月甲戌帝至自上都乙亥用帝師奏釋大辟三人杖
以下四十七人戊寅詔輸米十萬石于權場故廩以備
北塞庚辰罷寧夏路行中書省以其事併入甘肅行省
冬十月癸卯有事于太廟十一月辛巳立江浙金銀銅

治轉運使司丙戌毯陽酋長之兄脫杭捧于法而刺酋
長之弟密刺八都阿魯酋長之弟脫杭忽先等各奉金
表來覲十二月甲子減海運腳價鈔一貫計每石六貫
五百文著為令丁卯禁諸王輒召有司官吏是月立皇
后巴約特氏

二年春正月己卯上思州叛賊黃聖許攻剽水口思光
寨湖廣行省調兵擊破之丙戌立安西王相府惟行王
傳事己丑御史臺臣言漢人同寮者嘗為姦人摭撫其

罪由是不敢盡言請于近侍實保齊實古爾齊中擇人
用之帝曰安用此曹其選漢人識達事體者為之以御
史中丞圖沁為御史大夫甲午授嗣漢三十八代天師
張與材太素凝神廣道真人管領江南諸路道教乙未
回紇布爾罕獻獅豹藥物二月乙亥朔中書省臣言陛
下自御極以來所賜諸王公主駙馬勲臣為數不輕向
之所儲散之殆盡今繼請者尚多臣等乞甄別貧匱及
赴邊者賜之其餘宜悉止從之丙午禁軍將擅易侍衛

軍蒙古軍以家奴代役者罪之仍令其奴別入兵籍以其主資產之半畀之軍將敢有縱之者罷其職庚戌詔軍卒擅更代及逃歸者死庚申詔自六盤山至黃河立屯田丙寅以大都留守司達魯噶齊段貞為中書平章政事三月壬申以中書平章政事博果密為昭文館大學士平章軍國事罷太原平陽路釀進蒲萄酒其蒲萄園民恃為業者皆還之癸酉實都言晉王噶瑪拉多羅岱言阿爾婁皆有異圖樞密院鞠之無驗帝命言晉王

者死言阿爾婁者謫從軍自效甲戌遣諸王伊奇哩班
布爾賓額琳沁雅里堅昂吉爾岱並駐夏于晉王齊喇
拉之地丙子車駕如上都夏五月甲戌詔民間馬牛羊
百取其一羊不滿百者亦取之惟色目人及數乃取甲
申禁諸王公主駙馬招戶已丑詔諸徒役者限一年釋
之母杖庚寅罷四川馬湖進獨本慈詔諸王駙馬及有
分地功臣戶居上都大都隆興者與民均納供需六月
己亥給瓜州沙州站戶牛種田具乙巳以調兵防農免

廣西容州等處田租一年丙午叛賊黃聖許遁入交趾
甲寅降官吏受贓條格凡十有三等秋七月癸酉詔茶
鹽轉運司印鈔提舉司運糧漕運司以三年為代雲南
福建官吏滿任者給驛以歸壬午括巴延阿珠阿爾哈
雅等所據江南田及權豪匿隱者令輸租敕增江西河
南省參政一員以朱清張瑄為之授特進上柱國廣西
賊陳飛雷通藍青謝發寇昭梧藤容等州湖廣左丞巴
特瑪琳沁擊平之八月丁酉朔禁舶商毋以金銀過海

諸使海外國者不得為商乙巳詔諸人告捕盜賊者強盜一名賞鈔五十貫竊盜半之應捕者又半之皆徵諸犯人無可徵者官給九月甲戌罷民間鹽鐵爐竈甲申雲南省臣額森布哈征乞蘭拔瓦農開陽兩寨其黨答剌率諸蠻來降乞藍悉平以其地為雲南路軍民總管府冬十月丁酉有事于太廟甲辰修大都城壬子車駕至自上都詔職官坐贓經斷再犯者加本罪三等贛州賊劉六十攻掠吉州江西行省左丞董士選討平之十

二月戊戌立徹里軍民總管府及蒙樣剛等甸軍民官
癸卯定諸王朝會賜與癸亥釋在京囚百人

大德元年春正月丙戌賜實保齊等農具牛種俾耕種
自給辛卯以張斯立為中書省參知政事給晉王所部
屯田農器二月丙申蒙陽甸酋長納款遣其弟阿不刺
等來獻方物且請歲貢銀千兩及置驛傳詔即其地立
通西軍民府甲辰諸軍民相訟者命軍民官同聽之戊
午羅羅斯酋長來朝己未改福建省為福建平海等處

行中書省徙治泉州減福建提舉司歲織段三千匹其
車渠帶工別立提舉司掌之封的立普哇拿阿迪提牙
為緬國王庚申改元大赦三月己巳諤勒哲等奏定銓
調選法庚午以陝西行省平章額森特穆爾為中書平

章政事中書省左丞梁溫都爾為中書省右丞

梁溫都
爾即梁

德珪甲戌詔各省合併鎮守軍福建所置者合為五十三

所江浙所置者合為二百二十七所丙子車駕如上都
丁丑封諸王特穆爾布哈為鎮西武靖王以江西省左

丞巴特瑪琳沁為中書左丞丁亥禁正月至七月捕獵
庚寅立江淮等處財賦總管府及提舉司五臺山佛寺
成皇太后將親往祈祝監察御史李元禮上封事止之

按李元禮傳云元禮上疏臺臣不敢以聞是太后未嘗因諫而止也

夏四月癸巳朔日有

食之五月丙寅河決汴梁發民三萬人塞之戊辰追收
諸位下為商者制書驛券丁丑禁民間捕鷺鴈鷓鴣庚寅
平伐苻領內附乞附于亦奚不薛從之上思州叛賊黃
聖許遣其子志寶來降六月甲午諸王伊爾根遣使乘

驛祀五嶽四瀆命追其驛券仍切責之以湖廣行省參政崔良知廉貪特賜鹽課鈔千錠戊戌平伐九寨來降甲寅罷亦奚不薛歲貢馬及羶衣丙辰詔僧道犯姦盜重罪者聽有司鞠問秋七月

按元典章是月定在外慶賀行禮以守土官為班首

武職雖品大者不得撓越元史缺載

辛未罷蒙古軍萬戶府入察遜塔拉

都元帥府甲申詔出使招諭者授以招諭使副取諸藥物者授以會同館使副但降旨差遣不給制命丁亥免上都酒課三年八月丁未命諸王阿濟格自今出獵悉

自供具毋傷民力九月丙寅罷括兩淮民田壬午車駕
還大都己丑罷南丹州安撫司立慶遠南丹溪洞等處
軍民安撫司詔邊遠官已優升品級而託他事不赴者
奪其所升官平珠六洞蠻及十部洞蠻皆來降命以蠻
夷官授之給衛士牧馬外郡者糧令毋仰食于民冬十
月丁酉有事于太廟乙卯瓜哇遣失刺班直木達奉表
來降戊午賑廬州揚州及韶州飢十一月壬戌禁權豪
僧道及各位下擅據鑛炭山場癸亥詔自今田獵始自

九月高麗王王昉告老乞以爵與其子諫戊辰增太廟
牲用馬丁丑詔以高麗王世子諫為開府儀同三司征
東行中書省左丞相駙馬上柱國高麗國王仍加授王
昉為推忠宣力定遠保節功臣開府儀同三司太尉駙
馬上柱國逸壽王十二月戊戌中書省臣言世祖撫定
江南沿江上下置戍兵三十一翼今無一二懼有不虞
帝命與樞密院議之復立芍陂洪澤屯田壬寅朝洞蠻
內附立長官司二命楊漢英領之閏月壬戌詔諸軍戶

賣田者由所隸官給文券已卯淮東飢遣參議中書省
事于章發廩賑之弛湖泊之禁仍聽正月捕獵

二年春正月壬戌詔以水旱減郡縣田租十之三傷甚
者盡免之老病單弱者差稅並免三年禁諸王公主駙
馬受諸人呈獻公私田地及擅招戶者已酉併土番碕
門安撫使司改為碕門魚通黎雅長河西寧等處軍民
宣撫司以翰林王惲閻復王構趙與鼎王之綱楊文郁
王德淵集賢王顯宋渤盧摯耶律有尚李泰郝采楊麟

皆耆德舊臣清貧守職特賜鈔二千一百餘錠二月乙丑立浙西都水庸田司專主水利以中書右丞徽政院副使張九思為平章政事與中書省事丙子罷中外土木之役癸未詔諸王駙馬毋擅祀嶽鎮海瀆申禁諸路軍及豪右人等毋縱畜牧損農乙酉車駕如上都罷建康金銀銅冶轉運司還淘金戶于原籍歲辦金悉責有司詔廉訪司作成人材以備選舉禁諸王從者假控鶴衛士佩帶擾民丙子以梁德珪為中書平章政事楊炎

龍為中書右丞三月庚寅以兩淮閒田給蒙古軍夏五月辛卯罷海南黎兵萬戶府及黎蠻屯田萬戶府以其事入瓊州路軍民安撫司壬辰以中書右丞何榮祖為平章政事湖廣左丞巴特瑪琳沁為中書右丞命中書省遣使監雲南四川海北海南廣西兩江廣東福建等處六品以下選已酉免南輝順德今年田租六月庚申罷江南門攤及夏稅並徵法禁諸王擅行令旨秋七月癸巳汴梁等處河決漂沒歸德數縣免其田租一年遣

尚書諾海御史劉賡等塞之壬寅詔諸王駙馬及諸近
侍自今奏事不經中書輒傳旨付外者罪之高麗王王
諫擅命妄殺詔遣中書右丞楊炎龍簽樞密院事洪君
祥召其入侍以其父昨仍統國政九月丙申車駕還大
都辛丑命廣海左右江戍軍依舊制以二年或三年更
代冬十月甲寅朔增海漕米為七十萬石壬戌置蒙古
都萬戶府于鳳翔戊寅令御史臺檢劾樞密院案牘十
一月丙申罷雲南行御史臺置肅政廉訪司壬寅以中

書右丞王慶端為平章政事十二月乙丑括諸路馬除
北孕攜駒者辛未詔諸逃軍復業者免役三年以江浙
行省平章政事達爾罕為左丞相辛巳命廉訪司歲舉
所部廉幹者各二人定諸稅錢三十取一歲額之上勿
增給陣亡軍妻子衣糧

三年春正月己丑中書省臣以天變屢見請依故事引
咎避位帝曰此漢人所說耳豈可一一聽從耶卿等但
擇賢者任之庚寅遣使問民疾苦除本年內郡色銀俸

鈔免江南夏稅十之三增給小吏俸米置各路惠民藥局擇良醫主之命中書省自今后妃諸王所需非奉旨勿給辛卯浙西廉訪使犯贓罪託權幸規免命御史臺鞫治之癸巳以達爾罕哈喇哈斯為中書左丞相二月癸丑朔車駕如柳林丁巳鄂勒哲等奏銓定省部官以次引見帝諭之曰汝等事多稽誤朕昔未知其人為誰今既閱視且知姓名其洗心滌慮各欽乃職復蹈前失罪不汝貸罷四川福建等處行中書省陝西行御史臺

江東荆南淮西三道宣慰司置四川福建宣慰司都元帥府及陝西漢中道肅政廉訪司庚辰車駕如上都三月癸巳遣普陀僧一山齋詔使日本甲午命何榮祖等更定律令詔軍官受贓罪重者罷職輕者降其散官或決罰就職停俸期年許令自効夏四月庚午申嚴江浙兩淮私鹽之禁辛未自通州至兩淮漕河置巡防捕盜司凡十九所己卯以禮部尚書額古爾布哈為中書左丞五月壬午罷江南諸路釋教總統所丙申海南建古

臺速龍探奔奚里諸番以虎象及杪羅木舟來貢庚子

復立征東行省

按地理志征東行省大德三年立未幾罷至治元年復立令高麗國王為左丞

相與紀
互異

以福建行省平章政事奇爾濟蘇為平章政事

六月癸丑罷大名路所獻黃河故道田輸租戊午申禁
海商以人馬兵仗往諸番貿易以福建州縣官類多色
目南人命自今以漢人參用禁福建民冒稱權豪佃戶
規免門役秋七月庚辰中書省臣言江南編民五十餘
萬悉為嘉木楊喇勒智冒入寺籍宜加釐正從之丙申

詔禁捕鷺八月己酉朔太史院奏日食不應九月庚寅
置河東山西鐵冶提舉司癸巳罷括宋手號軍己亥車
駕還大都冬十月戊申朔有事于太廟十一月庚辰置
浙西平江湖渠閘堰凡七十八所丁酉浚太湖及澱山
湖十二月己酉徙鎮巢萬戶府戊沅靖毗陽萬戶府戊
辰州均州萬戶府戊常德澧州丙寅詔各省戍軍輪次
放還二年供役癸酉詔中書省貨財出納自今無券記
者勿與以謬爾根薩里為平章政事命兄子哈尚鎮漠

北

四年春正月丙申申嚴京師惡少不法之禁癸卯復淮
東漕渠二月丁未朔日有食之丙辰皇太后鴻吉哩氏
崩甲戌罷青海屯田改置于罕扎之地乙亥車駕如上
都三月乙未以寧國太平兩路旱賑之夏四月丙辰置
五條河屯田戊午以中書省斷事官布噶齊為平章政
事五月癸未帝諭集賢大學士諤爾根薩里等曰集賢
翰林乃養老之地自今諸老滿秩者升之勿令輒去其

諭中書知之六月己酉立緬國王子窟麻刺哥撒八為
緬國王丙辰以太傅伊徹察喇為太師諤勒哲為太傅
丁巳御史中丞博果密卒甲子置耽羅總管府詔各省
自今非奉命毋擅役軍弔吉而瓜哇暹國蘇八等國二
十二人來朝秋七月甲戌朔上皇太后尊諡曰裕聖皇
后升祔裕宗廟

按元史后妃傳裕宗皇后大德四年諡曰裕聖升祔裕宗廟至大三年又追尊

諡曰徽仁裕聖皇后本紀于此即書徽仁非是今據傳改辛卯改乳母冀國夫人韓

氏為燕冀國順育夫人舒穆魯氏為冀國夫人八月癸

卯朔更定蔭叙格蒙古色目人特優一級閏月庚子車
駕還大都以中書右丞賀仁傑為平章政事冬十月癸
酉朔有事于太廟十一月壬寅朔詔頒寬令免上都大
都隆興大德五年絲銀稅糧附近秣養馬駝之郡免稅
糧十之三其餘免十之一徒罪各減一半杖以下釋之
併遼陽省所轄狗站牛站為一十二月癸巳遣劉深哈
喇岱鄭祐將兵二萬人征八百媳婦

五年春正月壬子罷檀景兩州探金鐵冶提舉司以其

事入都提舉司二月己卯以劉深哈喇岱並為中書右丞鄭祐為參知政事罷福建織繡提舉司丁亥立征八百媳婦萬戶府二發四川雲南囚徒從軍乙未詔廉訪司官非親喪遷葬及以病給告者不得離職或以地遠職卑受任不赴者臺憲勿復用丁酉車駕如上都詔雲南行中書省減內外諸司官己亥令軍民官同鞠凡軍士殺人姦盜者夏四月壬午調雲南軍征八百媳婦癸巳禁和琳釀酒其諸王駙馬許自釀飲不得沽賣五月

河南妖賊醜斯伏誅壬戌雲南土官宋隆濟叛六月壬戌宋隆濟攻貴州知州張懷德戰死梁王遣雲南行省平章綽和爾參政布噶齊擊敗之秋七月戊戌朔以通泰等州水災賑之丁未命御史大夫托和齊整飭臺事詔軍官受贓者與民官同例命監察御史審覆扎爾古齊罪囚檢照蒙古翰林院案牘癸丑禁輝和爾陰陽巫覡等自今有大祠禱必請而行違者罪之命雲南省分蒙古射士征八百媳婦癸亥哈坦之孫托歡自北來歸

以安巴阿固台並知樞密院事八月甲戌遣色辰額呼
等將兵征金齒諸國庚辰遣官分道賑恤凡獄囚禁繫
累年疑不能決者令廉訪司具其狀申省臺詳讞仍著
為例各路被災重者免差稅一年貧乏之家計口賑恤

尤甚者優給之乙酉

按史文原作九月乙酉以七月戊戌朔推算則九月不應有乙酉日

考續通鑑綱目海都入寇事係于八月今據刪九月二字

海都大舉入寇哈尚大破

之海都走死冬十月戊辰朔以畿內歲饑增明年海運
糧為一百二十萬石壬午車駕還大都丙戌以歲飢禁

釀酒弛山澤之禁丁亥詔軍官既受命而不時赴及差
竣不即還者准民官例違限六月選人代之被代者期
年始叙十一月己亥諭中書近因禁酒聞年老需酒之
人有預市而儲之者其無釀具者勿問丁未遣劉國傑
及額森呼圖克將兵萬人巴拉及阿都齊將兵五千人
征宋隆濟減直糶米賑京師貧民設肆三十六所其老
幼單弱不能自存者廩給五月戊申徭人藍賴率丹陽
三十六洞來降十二月辛卯定強竊盜條格凡盜人孳

畜者取一償九然後杖之

六年春正月癸卯詔千戶百戶等自軍逃歸先事而逃者罪死敗而後逃者杖而罷之沒入其男女乙巳晉王噶瑪拉薨丙午朱清張瑄罷徙其諸子官江南者于京丁未江南僧石祖進告朱清張瑄不法事下御史臺按問尋誅之帝語臺臣曰朕聞江南富戶侵占民田以致貧者流離轉徙卿等嘗聞之否臺臣言曰富民多乞護持墾書依倚以欺貧民官府不能詰治宜悉追收為便

命即行之毋越三日詔自今僧官僧人犯罪御史臺與
內外宣政院同鞠宣政院官徇情不公者聽御史臺治
之乙卯築渾河堤禁豪家毋侵舊河詔軍官除邊遠出
征其餘遇祖父母父母喪依民官例立限奔赴二月內
戍遣陝西省平章伊蘇岱爾參政汪惟勤將川陝軍湖
廣平章劉國傑將湖廣軍征亦奚不薛一切軍務並聽
節制罷征八百媳婦右丞劉深等官收其符印驛券癸
巳帝有疾釋京師重囚三十八人三月丁酉以旱溢為

災詔赦天下大都平灤被災尤甚免其差稅三年其餘
災傷之地已經賑恤者免一年今年內郡邑銀俸鈔江
淮以南夏稅諸路鄉村人戶散辦門攤課程並除之甲
寅合祭昊天上帝皇地祇于南郊遣中書左丞相達爾
罕哈喇哈斯攝事夏四月丁卯曲赦雲南諸部蠻夷戊
子修盧溝上流石景山河堤釋重囚車駕如上都五月
乙巳給貧乏漢軍地以丁為差其孤寡者存恤六年逃
散者招諭復業戊申太廟寢殿災六月癸亥朔日有食

之太史院失于推筭詔中書議罪以聞甲子建文宣王
廟于京師辛未享于太廟秋七月辛酉以江浙行省參
知政事和爾多卜丹為中書右丞九月己酉龍興民譌
言括童男女至有殺其子者命誅為首者三人冬十月
甲子改浙東宣慰司為宣慰司都元帥府徙治慶元鎮
遏海道置大同路黃花嶺屯田罷軍儲所立屯儲軍民
總管萬戶府丙子車駕還大都十一月甲午劉國傑裨
將宋光率兵大敗蛇節

按蛇節係水西土官之妻與宋隆濟同時為亂

賜衣二

襲仍授以金符辛亥以同知樞密院事哈達知樞密院
事詔江南寺觀凡續置民田及民以施入為名者並輸
租充役十二月辛酉御史臺臣言自大德元年以來數
有星變及風水之災民間乏食陛下敬天愛民之心無
所不盡理宜轉災為福而今春霜殺麥秋雨傷稼五月
太廟災尤古今重事臣等思之得非荷陛下重任者不
能奉行聖意以致如此若不更新後難為力乞令中書
省與老成識達治體者共圖之復請禁諸路釀酒減免

差稅賑濟飢民帝命即議行之庚辰命中書省更定畧賣良人罪例

七年春正月己酉弛饑荒所在山澤河泊之禁一年乙卯詔凡為匿名書辭語重者誅之輕者流配首告人賞鈔有差皆籍沒其妻子充賞命御史臺宗正府委官遣發朱清張瑄妻子來京師仍封籍其家資拘收軍器海舶等丁巳命樞密院選軍士習農業者十人教軍前屯田二月壬戌詔中書省汰諸司冗員仍令諭樞密院除

出征將帥外掌署院事者定其員數以聞辛未以平章政事行上都留守茂巴爾斯陝西行省平章阿喇卜丹並為中書平章政事江南行臺御史中丞尚文為中書左丞江浙行省參知政事董士珍為中書參知政事壬申詔樞密院宗正府等自今每事與中書共議然後奏聞諸司不得擅奏遷調官員雖經特旨用之而於例未允者亦聽覆奏丁丑詔中書省設官自左右丞相以下平章二員左右丞各一員參知政事二員定為八府

按中

書省官數本至元二十二年舊制今因更定八府政復載之攷元史百官志至元末中書省平章或增至六員蓋已非復舊制是年所以更定也然八府之制百官志未載此則志有脫漏

已卯以侍御史

托迪為中書參知政事壬午帝語中書省臣曰比有以歲課增羨希求爵賞者此非培克于民何從而出自今除原額外勿以增羨作正數罷江南財賦總管府及提舉司丁亥詔自今除樞密院御史臺宣政院依舊奏選諸司毋得擅奏其舉用人員並經中書省三月庚寅遣使宣撫循行天下乙未中書平章巴延梁德珪段貞諤

爾根薩里右丞巴特瑪琳沁左丞額古爾布哈參政密喇卜和卓張斯立等以受朱清張瑄賄賂詔皆籍其家治罪有差以洪君祥為中書右丞甲辰詔定贓罪為十二章京朝官月俸外增給祿米外任官無公田者亦量給之乙巳以征八百媳婦喪師誅劉深笞哈喇岱鄭祐罷雲南征緬分省戊申索羅希岳鉉等進大元一統志己酉追收原降除免和顧和市璽書以托歡誣告諸王托克托謫置湖廣省軍前自效癸丑樞密院臣及監察

御史言中丞董士選貸朱清張瑄鈔非義帝曰臺臣稱貸不必問也若言者不已後當杖之甲寅車駕如上都夏四月癸亥徵藩臣陳天祥張孔孫郭筠至京師以天祥孔孫為集賢大學士筠為昭文館大學士皆同議中書省事庚午中書左丞相達爾罕言僧人修佛事畢必釋重囚有殺人及妻妾殺夫者皆指名釋之生者苟免死者負冤於福何有帝然之辛未流朱清張瑄子孫於遠方庚辰蛇節降令海拉蘇將兵五千守之餘衆遣還

各戍撥碣門四川軍人一千鎮羅羅斯丁亥誅蛇節

按謹

御批

通鑑輯覽是年三月劉國傑敗宋隆濟及蛇節于墨特
川擒斬蛇節隆濟遁去尋為兄子宋阿重執之來獻詔
斬之元紀未載斬宋隆濟事而
載斬蛇節于四月互有異同是月復以特爾格為平

章政事蘭溪處士金履祥卒五月己丑開上都大都酒
禁其所隸兩都州縣及山後河東山西河南嘗告飢者
仍悉禁之辛亥奉使宣撫耶律希逸劉賡言平陽僧徹
爾威犯法非一有司憚其豪強不敢詰問聞臣等至潛
逃京師中書省臣言宜捕送其所令省臺宣政院遣官

雜治從之甲寅濬上都灤河乙卯禁諸王駙馬毋輒杖
州縣官吏違者罪王府官立和琳宣慰司都元帥府以
呼喇珠遥授中書省左丞為宣慰使都元帥閏月戊午
朔日有食之壬戌詔禁犯曲阜林廟者己巳諤勒哲卒
辛巳詔僧人與民均當差役癸未命江浙行省右丞董
士選發所籍朱清張瑄貨財赴京師其海外未還商舶
至則依例籍沒六月己丑御史臺臣言瓜沙二州自昔
為邊鎮重地今大軍屯駐甘州使官民反居邊外非宜

乞以蒙古軍萬人分鎮險隘立屯田以供軍實為便從之罷四川宣慰司西川行中書省以雲南行省平章托克托湖廣行省議事平章程鵬飛並為平章政事癸巳叛賊雄挫來降乙未以亦奚不薛就平留特默齊軍二千入討阿永叛蠻餘悉放還癸卯詔凡軍官子弟年及二十者與民官子孫同倖直一年方許襲職萬戶于樞密院千戶于行省百戶於本萬戶乙巳命甘肅行省修阿合潭曲尤壕以通漕運秋七月壬戌禁僧人以修建

寺宇為名齋諸王令旨乘傳擾民汰宿衛士丙寅以達

爾罕哈喇哈斯為中書右丞相知樞密院事

按宋元通鑑載是時

並以阿固岱為左丞相元史畧之

丙子詔除集賢翰林老臣預議朝政

其餘三品以下年七十者各升散官一等致仕丁丑罷

江南白雲宗攝所其田依例輸租都勒幹徹伯爾穆爾

特穆爾等遣使請息兵帝命安西王慎飭軍士安置驛

傳以俟其來八月辛卯以平陽太原地震遣使分道賑

之九月戊午車駕還大都丙寅遣刑部尚書塔齊爾翰

林直學士王約使高麗以其國相吳祁專權徵詣闕問
罪丙子罷僧官有妻者壬午復茂巴爾斯平章政事冬
十月戊子弛太原平陽酒禁以浙江飢減海運糧四十
萬石辛卯復立陝西行御史臺癸巳御史臺臣及諸道
奉使言行省官久任與所隸編氓聯姻害政詔互遷之
以濟爾噶呼知樞密院事給大都文宣王廟灑掃戶五
乙未留蛇節養子阿闕于本境以撫其民詔諸司凡錢
糧不經中書省議者勿奏辛亥詔軍戶貧乏者存恤六

年十一月甲寅朔併海道運糧萬戶府為海道都漕運
萬戶府甲子命依十二章斷僧官罪十二月乙酉弛京
師酒課許貧民釀酒辛丑加封真武為元聖仁威玄天
上帝丁未以轉輸軍餉勞免思播二州及潭衡辰沅等
路稅糧一年常澧三之一淘金站戶無種佃者免雜役
一年七道奉使宣撫所罷賊汚官吏凡一萬八千四百
七十三人賊四萬五千八百六十五錠

按元代設官分
職皆有定數可

稽若賊汚官吏多至一萬八千餘人是天下竟無一
潔清自守者矣史官載事不免有過甚之詞謹附識審

冤獄五千一百七十六事

八年春正月己未以災異故詔天下恤民隱省刑罰庚申以雲南順元同知宣撫事宋阿重生獲其叔隆濟來獻特升其官賜衣一襲癸亥禁銅朱清張瑄族屬丙寅以御史中丞太僕卿塔斯布哈為中書右丞江南行臺中丞趙仁榮為中書參知政事庚午以年扎克嘉勒燮為帝師辛巳詔諸王駙馬往遼東捕海東鶻者毋給驛自榮澤至睢州築河防十有八所二月丙戌增置國子

生二百員選宿衛大臣子孫充之辛卯命諸王徹伯爾
所部軍屯田于巢察克楚谷甲午詔父子兄弟有才者
許並居風憲減宿衛繁冗者丙午車駕如上都賜圖沁
及塔喇海以所籍朱清張瑄田人各六十頃三月丁巳
詔軍民官已除以地遠官卑不赴者奪其官不叙軍官
擅離所部者悉遣還翼軍人不告所部私歸者杖而還
之戊辰詔諸王駙馬所分郡邑達嚕噶齊惟用蒙古人
三年依例遷代其漢人女真契丹名為蒙古者皆罷之

夏四月丙戌置千戶所戍定海以防歲至倭船詔諸路
輝和爾哈瑪爾自相訟者歸都護府與民交訟者聽有
司專決甲午詔朝廷諸王駙馬進捕鷹鷄皆有定戶自
今非鷹師而乘傳冒進者罪之丁未分教國子生于上
都五月癸丑朔日有食之辛酉以所籍朱清張瑄江南
財產隸中政院壬申中書省臣言吳松江按河渠志浙
西諸山之水
受之太湖下為吳松江元史吳字
下多一江字與志不符謹據刪寔海口故道潮水久
淤凡湮塞良田百有餘里况海運亦由是而出宜于租

戶役萬五千人濬治歲免租人十五石仍設行都水監以董其程從之六月癸未開和琳酒禁立酒課提舉司丁酉汝寧妖人李曹驢等妄言得天書惑衆事覺伏誅秋七月辛酉罷江淮等處財賦總管府九月癸丑車駕至自上都庚申巳延梁德珪並復為中書平章政事巳特瑪琳沁復為中書右丞密喇卜和卓復為中書參知政事以江浙行省平章阿里為中書平章政事庚午以戶部尚書張祐為中書參知政事癸酉諸王徹伯爾鄂

勒幹等遣使來附以冀孟諸州去歲霖雨減其租冬十月己卯有事于太廟辛巳以宣徽使大都護長壽為中書右丞陝西行省右丞托歡為中書參知政事丁亥詔諸王駙馬毋乘驛以獵庚寅封皇姪哈尚為懷寧王戊戌命省臺院官鞠高麗國相吳祁及千戶石天輔等以祁離間王父子天輔謀歸日本皆笞之徙安西十一月壬子詔內郡江南人凡為盜黥三次者謫戍遼陽諸色人及高麗三次免黥謫戍湖廣禁盜禦馬者初犯謫戍

再犯者死丁卯復免僧人租戊辰以武備卿特古勒德爾為御史大夫壬申增海漕米為百七十萬石十二月庚子復立益都淘金總管府辛丑封諸王徹伯爾為威武西寧王

九年春正月甲子以昂吉爾部民張道努等舊權為軍者復隸民籍壬申弛大都酒禁二月癸未中書省臣言近侍自內傳旨凡除授賞罰皆無文記懼有差違乞自今傳旨者悉以文記付中書從之乙未建大天壽萬寧

寺丁酉封諸王諤勒哲為衛安王定遠王永和爾為威
定王庚子命中書議行郊祀禮辛丑大赦令御史臺翰
林集賢院六部于五品以上各舉廉能識治體者三人
行省行臺宣慰司廉訪司各舉五人免大都上都隆興
差稅內郡色銀俸鈔一年江淮以南租稅及佃種官田
者均免十之二致仕官止有一子廕承廕者其僉使並
免之家貧者給半俸終其身三月丁未朔車駕如上都
庚戌以策凌巴鄂爾嘉勒姪桑節巴勒為帝師戊午以

樞密副使高興為平章政事仍樞密副使夏四月乙酉
以大同路地震懷仁縣地裂遣使賑之並免今年一切
租課徭役壬辰中書省臣言前代郊祀以祖宗配享臣
等議今始行郊禮專祀昊天為宜詔依所議行之五月
丁未以大都旱遣使禱雨戊申徵原任儒學提舉蕭料
赴闕命有司給以安車六月庚辰立子德壽為皇太子
詔告天下賜高年帛孝子順孫堪從政者量才任之親
年七十別無侍丁者從近遷除外官五品以下並減一

資諸處罪囚淹繫五年以上疑不能決者釋之流竄遠方之人量移內地甲午以潼川霖雨江溢敕有司給糧一月免其田租秋七月辛亥築郊壇於麗正文明門之南壬戌命兄子阿裕爾巴里巴特喇與其母鴻吉哩氏出居懷州丁卯以大司徒段貞中書右丞巴特瑪琳沁並為中書平章政事參知政事哈喇曼濟為右丞參知政事密喇卜和卓為左丞參議中書省事伊遜巴爾為參知政事丁丑給曲阜林廟灑掃戶以尚珍署田五十

頃供歲祀丙戌商胡塔奇以寶貨來獻以鈔六萬錠給其直九月庚申車駕至自上都冬十月辛巳有事于太廟乙未帝諭中書省樞密院御史臺臣曰省中政事聽右丞相哈喇哈斯達爾罕總裁自今用人非與達爾罕共議者悉罷之十一月丁未以鈔萬錠給雲南行省命與貝參用其貝非出本土者同偽鈔論庚午祀昊天上帝于南郊十二月庚寅皇太子德壽薨

十年春正月丙午濬吳松江等處漕河庚戌濬真揚等

州漕河令鹽商每引輸鈔二貫以為傭工之費戊午罷江南白雲宗都錄司汰其民歸州縣僧歸各寺田悉輸租壬戌發河南民十萬築河防丁卯禁近侍無輒驛召外郡官營國子學于文宣王廟西偏閏月甲午以前中書平章政事特爾格江浙行省平章舍哩河南行省平章阿薩爾並為中書平章政事行宣政院使張閭四川行省左丞杜思敬並為中書左丞參議中書省事劉源為參知政事二月辛亥中書省臣言近侍傳旨以文記

至省者凡一百五十餘人令臣擢用其中犯法妄進者

實多宜加遴選從之丙辰封博囉為鎮寧王錫以金印

按博羅封鎮寧王諸王表
作大德九年與紀互異

丁卯以額古爾布哈為中書

左丞戊辰車駕如上都三月己卯崆古王遣使來貢夏

四月庚子朔詔凡匿鷹犬者沒家資之半笞三十來獻

者給之以賞壬戌雲南羅雄州軍火主阿邦龍少結豆

溫匡虜普定路諸蠻為寇平章伊蘇岱爾捕斬之癸亥

置崑山嘉定等處水軍上萬戶府甲子倭商有慶等抵

慶元貿易以金鎧甲為獻命江浙行省平章阿喇卜丹等備之五月癸未詔西番僧往還者不許馳驛給以舟車乙酉命同知樞密院事塔爾固岱塔喇海並知樞密院事遣高麗國王王昨還國仍署行省以鎮撫之丁亥詔命右丞相哈喇哈斯達爾罕左丞相阿固岱等整飭庶務凡銓選錢穀等事一聽中書裁決百司勤怠者悉以名聞六月壬戌來安路總管岑雄叛湖廣行省遣宣慰副使和塔拉特穆爾招諭之雄令其子世堅來降賜

衣物遣之秋八月丁巳京師文宣王廟成行釋奠禮冬
十月丁未有事于太廟丁卯青山叛蠻紅犵獠等來附
十一月己巳車駕還大都十二月乙卯帝有疾禁天下
屠宰四十二日丙辰遣宣政院使實迪等禱于太廟
十二年春正月丙寅朔帝大漸癸酉崩于玉德殿年四
十葬起輦谷諡曰欽明廣孝皇帝廟號成宗國語曰
諤勒哲圖皇帝

成宗元貞二年大德十一年凡十三年

欽定續通志卷六十二

欽定四庫全書

史部

欽定續通志卷六十三

四

主事_臣尹壯圖覆勘

總校官原任侍講臣王燕緒

欽定四庫全書

欽定續通志卷六十五

元紀

武宗

武宗皇帝諱哈尚世祖皇太子珍戩第二子達爾瑪巴
拉之子成宗兄子也母鴻吉哩氏初摠兵北邊與叛王
海都戰屢敗之海都走死大德八年封懷寧王置王傳
官食瑞州六萬五千戶尋執叛王伊蘇托噶等又俘獲

海都之子徹伯爾家屬於都勒幹部降王圖沙瑪復叛
與戰敗之北邊悉平成宗晚年皇后巴約特氏與政忌
帝兄弟乃出帝母弟阿裕爾巴里巴特喇與帝母居懷
州無何太子德壽卒成宗寢疾后恐帝立修前怨召安
西王阿南達及諸王莽賚特穆爾入朝而陰屬意安西
十一年正月成宗崩丞相阿固岱平章賽音諤德齊巴
特瑪琳沁巴延與莽賚特穆爾謀奉后垂簾聽政援立
安西王潛遣師斷帝歸路時帝適遣喀喇托克托入京

計事丞相哈喇哈斯急令還報且恐帝不時至內難將
作乃先遣使迎阿裕爾巴里巴特喇於懷州監國至則
定計誅阿固岱巴特瑪琳沁賽音諤德魯巴延等并執
阿南達莽賚特穆爾歸于上都遣使迎帝三月帝自阿
勒台山至和琳諸王勲戚畢會合辭勸進帝謝曰吾母
吾弟在大都俟宗親畢會再議耳夏五月乙丑至上都
阿裕爾巴里巴特喇侍母來會左右部諸王畢至乃廢
皇后巴約特氏出居東安州尋與阿南達莽賚特穆爾

並賜死甲申帝即位於上都大赦追尊皇考曰皇帝尊
母元妃曰皇太后壬辰加知樞密院事托多爾海太傅
中書右丞相哈喇哈斯達爾罕太保並錄軍國重事知
樞密院事塔喇海為中書左丞相預樞密院宣徽院事
同知徽政院事綽和爾伊克扎爾古齊阿實克布哈江
浙行省平章政事莽賚布哈並為中書平章政事江浙
行省左丞劉正為中書左丞遙授中書左丞奇徹福建
道宣慰使額森特穆爾並為中書參知政事中書右丞

行御史中丞塔斯布哈為御史大夫平章政事綽和爾
為知樞密院事特授奇塔特布濟克中書平章政事延
慶使綽爾齊中書右丞同知和琳等處宣慰司事塔爾
海中書右丞阿里中書左丞托克托御史大夫是月封
皇太子乳母李氏為壽國夫人其夫燕嘉努為壽國公
以中書平章政事哈克緞為遼陽行省平章政事六月
癸巳朔立弟阿裕爾巴里巴特喇為皇太子甲午建行
宮于翁果察圖之地立宮闕為中都己亥以拱衛直都

指揮使茂穆蘇角觝屢勝遙授平章政事壬寅塔喇海
加太保錄軍國重事太子太師甲辰以平章政事行和
琳等處宣慰使都元帥哈喇格爾通政使武備卿特穆
爾布哈並知樞密院事乙巳中書省臣言中書宰臣十
四員御史大夫四員前制所無詔與翰林集賢諸老臣
議擬以聞戊申特授尚乘卿布呼齊綽和爾並平章政
事大同屯儲軍民總管府達魯噶齊克爾格木騰中書
右丞辛亥以中書平章政事托克托為江西行省平章

政事甲寅敕內郡江南高麗四川雲南諸寺僧誦藏經
為三宮祈福丙辰塔斯布哈托克托並遙授左丞相戊
午進封高麗王王矩為瀋陽王加太子太傅駙馬都尉
己未封寧遠王庫庫楚為寧王庚申遙授左丞相行御
史大夫塔斯布哈右丞相秋七月癸亥朔封諸王圖喇
為越王甲子命御史臺大夫特古勒德爾知樞密院事
塔爾呼岱中書平章政事緯和爾以即位告謝南郊丙
寅以中書參知政事趙仁榮為太子詹事以阿保功授

莽賚大司徒封其妻梅仙為順國夫人遣丕勒雅爾邁
達哩及達克丹詣西域取佛鉢舍利丕勒雅爾邁達哩
遙授宣政使達克丹遙授平章政事並命太傅右丞相哈
喇哈斯達爾罕太保左丞相塔喇海綜理中書庶務詔
諭中外壬申命御史大夫特古勒德爾中書平章政事
綽和爾樞密副使布呼齊以即位祇謝太廟以安西平
江吉州三路為皇太子分地越州路為越王圖喇分地
癸酉罷和琳宣慰司置行中書省及青海等處宣慰司

都元帥府和琳總管府以太師伊徹察喇為和琳行省
右丞相中書右丞相哈喇哈斯達爾罕為和琳行省左
丞相依前太傅錄軍國重事丙子以江浙行省平章政
事塔斯哈雅知樞密院事綽和爾並為中書平章政事
丁丑封諸王班布爾實為齊王圖烈納為濟王德勒德
爾布哈為北寧王太師伊徹察喇為淇陽王加平章政
事托克托太尉以中書左丞相塔喇海為中書右丞相
監修國史御史大夫塔斯布哈為中書左丞相江浙行

省平章政事嘉琿河南江北行省平章政事帕哈哩鼎
並為中書平章政事平章政事特們德爾為江西行省
平章政事戊寅以儀鳳司大使和斯哈雅特穆爾布哈
教坊司達魯噶齊實迪並遙授平章政事為玉宸樂院
使己卯以集賢院使拜布哈為中書平章政事庚辰以
御史中丞濟爾噶朗為御史大夫辛巳加封至聖文宣
王為大成至聖文宣王敕中書省庶政非公議者勿奏
以遙授左丞相同知樞密院事額爾吉訥知樞密院事

御史中丞王壽江浙行省左丞郝天挺並為中書左丞
壬午命御史大夫特古勒德爾知樞密院事塔爾呼岱
中書平章政事綽和爾以即位告社稷丙戌御史大夫
阿爾婁言舊制中書省樞密院御史臺宣政院許得自
選其人他司悉從中書銓擇近臣不得輒奏如此則紀
綱不紊帝嘉納之以同知宣徽院事巴勒達實為中書
左丞中書參知政事奇徹為四川行省左丞賑浙江湖
廣江西屬郡饑已丑賑安西等郡饑八月甲午中書省

臣言內降旨與官者八百八十餘人已除三百未除者
猶五百餘請自今越奏者勿與詔自今不由中書奏者
勿與官又言外任官帶相銜非制也請勿與從之乙未
以治書侍御史額卜德呼勒為中書參知政事戊戌御
史大夫托克托封秦國公辛亥中書右丞博囉特穆爾
以國字譯孝經進詔中書省刻板模印諸王以下皆賜
之丁巳以中書左丞王壽為御史中丞戊午中書平章
政事奇塔特布濟克綽和爾拜布哈並加太尉中書右

丞塔喇海加太尉平章政事以中書左丞博囉特穆爾
為中書右丞九月甲子車駕至大都辛未加塔喇海塔
斯布哈並太尉丁丑中書省臣言比議省臣員數奉旨
依舊制定為十二員右丞相塔喇海左丞相塔斯布哈
平章綽和爾奇塔特布濟克如故餘令臣等議臣等請
以阿實克布哈塔斯哈雅為平章政事巴勒達實劉正
為右丞郝天挺額森特穆爾為左丞于璋額卜德呼勒
為參知政事其班朝諸司冗員並宜揀汰從之甲申詔

立尚書省分理財用命塔喇海塔斯布哈仍領中書以
托克托嘉琿帕哈哩鼎任尚書省仍使自舉官屬己丑
以中書平章政事拜布哈為浙江行省平章政事辛卯
御史臺臣言至元中阿哈瑪特綜理財用立尚書省三載
併入中書其後僧格用事復立尚書省事敗又併入
中書粵自大德五年以來四方地震水災歲仍不登百
姓重困便民之政正在今日頃又聞為摠理財用立尚
書省如是則必增置所司濫設官吏殆非益民之事也

且綜理財用在人為之若止命中書整飭未見不可帝
曰卿言良是此三臣願任其事姑聽其行冬十月庚子
中書省奏初置中書省時裕宗為中書令嘗至省署敕
其後僧格遷立尚書省不四載而罷今復遷中書於舊
省乞徙中書令位仍請皇太子一至中書從之壬寅封
知樞密院事綽和爾為容國公乙巳敕方士日者毋游
諸王駙馬之門丙午封御史大夫特古勒德爾為鄆國
公以中衛親軍都指揮使邁努知樞密院事丙辰以行

省平章摠督軍馬得佩虎符其左丞等所佩悉追納中書省奏常歲海漕糧百四十五萬石今江浙歲儉不能如數請仍舊例湖廣江西各輸五十萬石並由海道達京師從之十一月癸亥封諸王伊克圖為楚王辛未以塔喇海領中政院事乙亥中書省臣言大都路供億浩繁槩于屬郡取之其軍站鷹坊控鶴等戶恃其雜徭無與冒占編氓請降璽書依祖宗舊制悉令均當或輒奏請者亦宜禁止免建康路所屬今年酒醋課乙酉詔皇

太后軍民人匠等戶租賦徭役並隸徽政院庚寅賜太師伊徹察喇江南田四十頃時賜田悉奪還官中書省為言有旨伊徹察喇自世祖時積有勲勞非餘人比宜以前後所賜合百頃與之仍敕行省平章拜布哈領其歲入十二月壬辰朔中書省臣言舊制金虎符及金銀符典瑞院掌之給則由中書事已則復歸典瑞院今出入多不由中書下至商人結託近侍奏請以致泛濫出而無歸臣等請覈之自後除官及奉使應給者非由中

欽定四庫全書

欽定續通志

卷六十三

九

書省勿給從之辛丑如大聖壽萬安寺授吏部尚書察
納平章政事領工部事癸卯命留守司以來歲正月十
五日起燈山於大明殿後延春閣前庚戌以山東河南
江浙饑禁民釀酒丁巳詔宣政院併省佛事中書省臣
言各處民饑除行宮外工役請悉停罷從之又言律令
者治國之急務當以時損益世祖嘗有旨金泰和律勿
用令老臣通法律者參酌古今從新定制至今尚未行
臣等為律令重事未可輕議請自世祖即位以來所行

條格校讎歸一遵而行之從之庚申詔明年改元

至大元年春正月辛酉朔曲赦御史臺見繫犯贓官吏
罷止徵贓罷職癸亥敕樞密院發六衛軍萬八千五百
人供翁果察圖建宮工役甲子授中書平章政事阿實
克布哈右丞相行御史大夫丙寅從江浙行省請罷行
都水監以其事隸有司丁卯以中書右丞伊克德濟為
平章政事己巳紹興台州慶元廣德建康鎮江六路饑
戶月給米六斗以沒入朱清張瑄物貨隸徽政院者鬻

鈔三十萬錠賑之特授乳母夫壽國公楊燕嘉努開府儀同三司甲戌中書省臣言進海東青鶻者當乘驛馬五百不敷敕遣奇味英通括民間車馬兵部請以各驛馬陸續而進勿括為便從之戊子皇太子請以阿實克布哈復入中書托克托復入御史臺己丑中書省臣言阿實克特穆爾請遣嘉琿達詣河西地采玉馱攻玉沙需馬四十餘匹采玉人千餘臣等以為不急之務勞民乞罷之又言近百姓艱食盜賊充斥苟不嚴治將至滋

蔓宜遣使巡行遇有罪囚即行決遣與隨處官吏共議
弭盜方畧明立賞罰或匿盜不聞或期會不至或踰期
不獲者官吏連坐有旨宜即議行之封諸王額森特穆
爾為營王以乳母夫鄂爾多為司徒二月癸巳立鷹坊
為仁虞院以右丞相托克托遙授左丞相推勒特穆爾
伊克扎爾古齊伊爾齊並為仁虞院使賑汝寧歸德路
饑民甲午賑益都濟寧等路饑戊戌以上都衛軍三千
人赴翁果察圖行宮工役壬寅詔以開成路地震前已

免租二年今再免一年甲辰發軍千五百人修五臺山
佛寺甲寅賑和琳貧民北來者仍于大同隆興等處糴
糧以賑就令屯田已未以皇太子建佛寺立營繕署三

月丁卯建興聖宮

為皇太后所居

遣使祀五嶽四瀆名山大川

復立白雲宗攝所戊寅車駕如上都建佛寺於大都城
南封中書右丞相行平章政事阿實克布哈為康國公
以甘肅行省右丞托克托穆爾為中書平章政事加大
司徒壬午嗣漢天師張與材來朝加金紫光祿大夫封

留國公夏四月戊戌封三寶努為渤海國公希沙為賓國
公加特們德爾右丞相都護邁珠中書右丞癸卯加授
平章政事嘉琿太子太保太尉平章軍國重事魏國公
甲辰知樞密院事額爾吉訥遙授右丞相辛亥樞密院
臣言諸王各用其印符乘驛使臣旁午驛戶困乏宜準
舊制量其馬數降以璽書從之乙卯遣米楫等使蘇魯
國丙辰高麗國王王昺請罷征東行省五月丙寅知樞
密院事塔爾呼岱遙授左丞相乙亥知樞密院事哈喇

格爾遙授左丞相丙子禁白蓮社毀其祠以其人還隸
民籍授右丞相塔斯布哈上柱國監修國史加左丞相
奇塔特布濟克太子太傅甲申立大同侍衛親軍都指
揮使司以丞相齊勤特穆爾為使摘通惠河漕卒九百
餘人隸之漕事如故六月己丑渤海國公三寶努加錄軍
國重事中書右丞相應國公太子詹事平章軍國重事
大司農庫春加太子太保左丞相托克托加上柱國太
尉遙授參知政事行詹事丞達實多加平章軍國重事

戊戌以大都饑發官廩減價糶之封永和爾為定王駙
馬阿實克為昌王並賜金印加宦者李邦寧大司徒遙
授左丞相仍領太醫院事辛丑以沒入朱清張瑄田產
隸中宮立江浙財賦總管府提舉司己酉以河南山東
饑即以兩道沒入贓鈔賑之加奇塔特布濟克錄軍國
重事秋七月庚申敕以金銀歲入數少自今有以金銀
奏請及托人轉奏者皆抵罪壬戌禁鷹坊於大同隆興
等處縱獵擾民築呼鷹臺於鄆州澤中翁果察圖行宮

成立中都留守司兼開寧路都總管府丁卯

元史作辛卯誤今改

賑濟寧水災己巳賑真定及藁城水災癸酉弛上都酒

禁壬午封柰曼岱為壽王癸未樞密院臣言世祖時樞

密院臣六員成宗時增至十三員今署事者三十二員

乞省之敕罷塔斯岱等一十一人乙酉以叅虎人徹爾

濟蘇為監察御史是月以左丞相塔斯布哈為中書右

丞相太保奇塔特布濟克為中書左丞相內外大小事

務並聽中書省區處諸王公主駙馬勢要人等毋得沮

抗近侍官屬及內外諸衙門毋得隔越聞奏各處行省
宣慰司及在外諸衙門等官非奉旨并中書省明文毋
得擅自離職乘驛赴京營幹私事八月辛丑以中都行
宮成賞官吏有勞者癸卯加中書右丞領將作院呂天
麟大司徒戊申立中都萬億庫乙卯中書省臣言外臺
行省及諸人應詔言事未敢一一上煩聖聽請集朝臣
議擇其切于事者小則輒行大則以聞從之九月丙辰
高麗國王王昺卒命薩納台特默徹勒使賽瑪爾堪部

壬戌太尉托克托奏泉州大商哈蘇台吉嚕進異木沉檀可構宮室者敕江浙行省驛致之癸亥萬戶伊拉瑪和斯來自賽瑪爾堪等城進呈太祖時所造戶口清冊賜銀鈔幣帛有差乙亥帝還大都弛諸路酒禁戊寅泉州大商瑪哈丹達爾進珍異及寶帶西域馬庚辰以高麗國王王章嗣高麗王諸王圖們進所藏太宗玉璽封圖們為陽翟王冬十月甲午以阿實克布哈知樞密院事丁酉罷大都樞密癸卯中書省臣請以湖廣米十萬

石貯於揚州江西江浙海漕三十萬石內分五萬石貯
朱汪利津二倉以濟山東饑民從之甲辰從帝師請以
釋教都總管多爾濟巴勒兼領諾爾布地產錢物為都
總管府達魯噶齊總其財賦以西番僧嘉勒幹巴勒為
翰林承旨左丞相知樞密院事特穆爾布哈加錄軍國
重事中書右丞司徒圖古勒河南江北行省右丞伊蘇
內史托卜華並知樞密院事乙巳改護國仁王寺照應
規運總管府為會福院丙午立興聖宮掌醫監十一月

已未中書省臣言世祖時省院臺及諸司皆有定員邇者諸司遞陞一司多至二三十員事不改舊而官日增請依大德十年員數冗濫者悉行減汰從之庚申增官吏俸以至元鈔依中統鈔數給之止其祿米歲省米四十萬石吏員以九十月出身如舊制丁卯中書省臣言今銓選錢糧之法盡壞廩藏空虛中都築城大都建寺及為諸貴近營私第軍民不得休息邇者用度愈廣每賜一人輒至萬錠惟陛下矜察又言銓選錢糧諸司乞

母干預帝曰已降制書令諸人毋干中書之政他日或有乘朕忽忘持內降文記及傳旨至中書省其執之以來朕將加罪以額爾吉訥為御史大夫已已以奇塔特布濟克為右丞相托克托為左丞相既又從托克托言以塔斯布哈與奇塔特布濟克俱為右丞相中書省臣言國用不給請沙汰宣徽太府利用等院籍定應給人數其在上都行省者委官裁省又天下屯田百二十餘所由所用者多非其人以致廢弛除四川甘州應昌府

雲南為地絕遠餘當選習農務者往與行省宣慰司親履其地可興者興可廢者廢各具籍以聞並從之詔開寧路及宣德雲州工役供億浩繁其賦稅除前詔已免三年外更免一年辛巳罷益都諸處哈喇齊等狩獵以銀七百五十兩鈔二千二百錠幣帛三百匹施昊天寺為水陸大會癸未皇太后造寺五臺山摘軍六千五百人供其役閏月己丑以大都米貴發廩十萬石減價以糴其貧民有鬻子者官為贖之丙申罷江南進沙糖止

富民輸粟賑饑補官丁酉禁江西湖廣汴梁私捕鴛鴦
已亥罷遼陽省進雕豹乙巳中書省臣言回回商人持
璽書佩虎符乘驛馬名奉敕求珍異或以一豹上獻亦
邀回賜虎符國之信器驛馬使臣所需畀諸商人誠非
所宜乞一繫追之從之丁未敕河西僧戶準先朝定制
從軍輸稅一與民同甲寅達爾罕哈喇哈斯卒十二月
庚申封哈喇繼為隴王甲戌以平章政事商議中書省
事太子賓客王太亨行太子詹事平章軍國重事太子

少詹事達實多為太子詹事賜御史臺官及監察御史宴服

二年春正月庚寅越王圖喇有罪賜死禁日者方士出入諸王公主近侍及諸官之門辛卯皇太子諸王百官上尊號曰統天繼聖欽文英武大章孝皇帝丙申詔天下弛山澤之禁恤流移毋令見戶包納差稅被災百姓內郡免差稅一年江淮免夏稅內外官加恩有差已亥封知樞密院事容國公綽和爾為句容郡王乙巳塔斯

布哈奇塔特布濟克言諸人恃恩徑奏璽書不由中書
直下翰林院給與者今覈其數自大德六年至至大元
年所出凡六千三百餘道皆干田土戶口金銀鐵冶增
餘課程進貢奇貨錢穀選法詞訟造作等事害及於民
請盡追奪之今後有不由中書者乞勿與從之丙午定
制大成至聖文宣王春秋二丁釋奠用太牢二月癸亥
罷行泉府院以市舶歸行省壬申令各衛董屯田官三
年一易甲戌弛中都酒禁三月己丑以梁王在雲南有

風疾命諸王羅丹代之庚寅車駕如上都封諸王額布
根為襄寧王辛卯罷杭州白雲宗攝所立湖廣頭陀禪
錄司甲辰中書省臣言國家歲賦有常頃以歲儉所入
曾不及半而去歲所支鈔至千萬錠糧三百萬石陛下
嘗命汰其求芻粟者而宣徽院博克遜竟不能行視去
歲反多三十萬石請用知錢穀者二三員於宣徽院佐
而理之又中書省斷事官大德十年四十三員今皇太
子位增二員諸王庫庫楚喇嘛噶圖勒亦各增一員非

舊制臣等以為皇太子位所增宜存諸王者宜罷並從之夏四月辛酉立興聖宮江淮財賦總管府癸亥摘漢軍五千給田十萬頃於直沽沿海口屯種又益以喀喇軍二千立鎮守海口屯儲親軍都指揮使司五月丁亥以通政院使哈喇格爾知樞密院事董建興聖宮丁酉以陰陽家言自今至聖誕節不宜興土功敕權停新寺工役甲辰御史臺臣言乘輿北幸而京師工役正興加之歲旱乏食民愚易惑乞留一丞相鎮京師後為例從

之六月癸亥從皇太子言禁諸賜田者馳驛徵租擾民
庚午中書省臣言奉旨既停新寺工役其停苑鷹坊諸
役乞併罷又太醫院遣使取藥材於陝西四川雲南費
公帑勞驛傳臣等議事于錢糧隔越中書省徑行乞禁
止並從之以大都隸儒籍者四十戶充文廟樂工甲戌
以宿衛之士比多冗雜遵舊制存蒙古色目之有閑閑
者餘皆革去皇太子言宣政院先奉旨毆西番僧者截
其手詈之者斷其舌此法昔所未聞乞更其令又言宣

政院文案不檢覈於憲章有礙遵舊制為宜並從之乙亥中書省臣言河南江浙省言宣政院奏免僧道伊魯勒昆達實密租稅臣等議田有租商有稅乃祖宗成法今宣政院一體奏免非制有旨依舊制徵之秋七月壬辰改松潘疊宕威茂州安撫司為宣撫司遷治茂州汶川縣乙未約蘇請更鈔法圖新鈔式以進又與保巴議立尚書省詔與奇塔特布濟克塔斯布哈齊勤特穆爾托克托集議以間甲辰改實保齊巴勒噶遜總管府為

奉時院乙巳保巴言臣與塔斯布哈奇塔特布濟克等集
議立尚書省事政事得失皆前日中書省臣所為今欲
舉正彼懼有累孰願行者臣請舊事從中書新政從尚
書尚書請以奇塔特布濟克托克托為丞相三寶努約
蘇為平章保巴為右丞王羅參知政事姓江者畫鈔式
以為印鈔庫大使並從之塔斯布哈言此大事遽爾更
張乞與老臣更議帝不從八月癸酉復立尚書省以奇
塔特布濟克為太傅右丞相托克托為左丞相三寶努

約蘇為平章政事保巴為右丞孟克特穆爾為左丞王
羅為參知政事中書左丞劉楫授尚書左丞商議尚書
省事詔告天下甲寅敕以海拉遜昔與巴延阿珠平江
南知兵事可授平章政事商議樞密院事己未尚書省
臣言中書省尚有逋欠錢糧應追理者宜存斷事官十
人餘皆併入尚書省又言往者大辟獄具尚書省議定
令中書省裁酌以聞宜依舊制從之以江西等處行中
書省參知政事郝彬為尚書省參知政事甲戌賜太師

奎騰名多爾濟戩巳卯三寶努言尚書省立更新庶政
變易鈔法用官六十四員其中宿衛之士有之品秩未
至者有之未歷仕者有之此皆素習於事既已任之乞
勿拘例授以宣敕詔天下敢有沮撓尚書省事者罪之
九月庚辰朔以尚書省條畫詔天下改各行中書省為
行尚書省詔朝廷得失軍民利害臣民有上言者皆得
實封上聞在外者赴所屬轉達各處人民復業者免一
切逋欠仍除差稅三年詔頒行至大銀鈔壬午平章政

事嘉璋以罪奪爵癸未尚書省臣言方今地大民衆事益繁冗若使省臣摠挈綱領庶官各盡厥職其事豈有不治頃歲省務壅塞朝夕惟署押文案事皆廢弛天災民困職此之由自今省部一切皆令從宜處置大事或須上請得旨即行用成至治上順天道下安民心又言國家地廣民衆古所未有累朝格例前後不一法吏輕重任意請自太祖以來所行政令九千餘條刪除繁冗使歸於一編為定制並從之以大都城南建佛寺立行

工部領行工部事三人行工部尚書二人仍令尚書右丞相托克托兼領之丙戌車駕至大都癸巳三寶努言冀寧大同保定真定以五臺建寺所須皆直取於民宜免今年租稅從之丁酉御史臺言比者近幸奏請江南田千二百三十頃乞拘還官從之己亥尚書省臣言今國用需中統鈔五百萬錠前者嘗借支鈔本至千六十六萬三千一百餘錠今乞罷中統鈔以至大銀鈔為母至元鈔為子仍撥至元鈔本百萬錠以給國用大都立資

國院山東河東遼陽江淮湖廣川漢立泉貨監六產銅之地立提舉司十九尚書省臣言三宮內降之旨曩中書省奏請勿行臣等謂宜仍舊行之倘於大事有害則復奏請帝是其言又言中書之務乞以盡歸臣等至元二十四年凡宣敕亦尚書省掌之今臣等議乞從尚書省任人而以宣敕散官委之中書從之以陝西行臺大夫大司徒實迪為左丞相行土蕃等處宣慰使都元帥丁未禁貴戚家養豹冬十月庚戌朔命皇太子兼尚書

令以行銅錢法詔天下辛亥皇太子言舊制百官宣敕散官皆歸中書以臣為中書令故也自今敕牒宜令尚書省給降宣命仍委中書從之丙辰約蘇言江南平垂四十年其民止輸地稅商稅餘皆無與其富室有蔽占王民奴使之者動輒百千家有多至萬家者乞自今有歲收糧滿五萬石以上者令石輸二升於官仍質一子為軍所輸之糧半入京師以養御士半留於彼以備凶年從之辛酉弛酒禁立酒課提舉司尚書省以錢穀繁

劇增戶部侍郎員外郎各一員又增禮部侍郎郎中各一員凡言時政者屬之癸亥以翰林學士承旨布琳尼敦為御史大夫乙丑以皇太后有疾詔天下釋大辟百人丁卯以御史大夫濟爾噶朗及中書左丞相托克托尚服院使達都並知樞密院事癸酉加知樞密院事圖古勒左丞相丁丑以遼陽行尚書省平章政事哈克緞為左丞相行中書省平章政事中書參知政事巴圖為平章政事行中書右丞商議中書省事和爾多卜丹為

右丞行中書省左丞參議中書省事特里托歡賈鈞並
中書參知政事戊寅御史臺臣言常平倉本以益民然
歲比不登遽立之必反害民又至大銀鈔始行品目繁
碎民猶未悟而又兼行銅錢慮有相妨又民間拘銅器
甚急弗便乞與省臣詳議又言歲凶乏食不宜遽弛酒
禁帝令與省臣議之十一月庚辰朔增吏部郎中員外
郎主事各一員令考功以行黜陟乙酉尚書省及太常
禮儀院言郊祀者國之大禮今南郊之禮已行而未備

北郊之禮尚未舉行今年冬至祀天南郊請以太祖皇帝配明年夏至祀地北郊請以世祖皇帝配從之丁亥以湖廣行省左丞沙卜珠岱為平章政事商議樞密院事丁未擇衛事子弟充國子學生十二月乙卯親饗太廟執事者陞賞有差丙辰併中書省左右司辛酉申禁漢人執弓矢兵仗壬戌封西僧瑪爾布允則為寧國公賜金印丁丑詔增百官俸定流官封贈等第內外百官三品以上者許請諡勲戚大臣奉旨賜諡者不在此例

三年春正月癸未省中書官吏自客省使以下一百八

十一員乙酉特授李孟平章政事集賢大學士同知樞密

院事

按樞密元紀作徽政考元典章及續通鑑綱目諸書皆作同知樞密院事元史百官志大德九年罷

徽政院此時已不設是官矣李孟授平章政事集賢大學士自應作同知樞密院事方與品秩相協今據

改

已丑以樺埒參議尚書省事辛卯立皇后鴻吉哩

氏乙未定稅課法丙申立資國院泉貨監命以歷代銅

錢與至大錢相參行用復立廣平順德路鐵冶都提舉

司戊戌詔湖廣行省招諭叛人上思州知州黃聖許辛

丑降詔招諭大徹里小徹里壬寅詔諭八百媳婦遣雲
南行省右丞索勒濟爾威招撫之乙巳令中書省官吏
如安圖居中書時例存設其已汰者尚書省遷叙二月
己未浚會通河甲子以上皇太后尊號告祀南郊乙丑
復以簽樞密院事賈鈞為中書參知政事丁卯從尚書
省臣言以至元鈔輸萬億庫銷毀其板止以至大鈔與
錢相權通行己巳寧王庫庫楚與越王圖喇子喇特納
實哩謀為不軌事覺庫庫楚下獄賜其妻諤勒哲死竄

喇特納實哩及其祖母母妻於拜特穆爾所以輝和爾
僧錫哩等二十四人同謀或知謀不首並磔於市辛未
多爾濟戰加錄軍國重事壬申以約蘇為尚書左丞相
駙馬都尉封齊國公乙亥以上皇太后尊號告祀太廟
三月己卯朔樞密院臣言國家設官分職都省治金穀
樞密治軍旅各有定制邇者尚書省弗遵成憲易置本
院官令依大德十年員數聞奏臣等議以特穆爾布哈
托卜齊延綽和爾伊蘇托克托額爾吉訥圖卜布哈達

都知樞密院事薩題勒密實史弼同知樞密院事吳元珪樞密副使塔喇海姑令為副樞帝令樞密院如舊制設官十七員乙酉以知樞密院事濟爾噶朗為陝西行尚書省平章政事遣刑部尚書瑪爾往甘肅和市羊馬庚寅尚書省臣言昔世祖令以叛王海都分地五戶絲為幣帛俟彼來降賜之藏二十餘年今其子徹伯爾向慕德化歸覲闕廷請以賜之帝曰世祖謀慮深遠若是待諸王朝會頒賞既畢卿等備述其故然後與之使彼

知愧壬辰車駕如上都夏四月己酉容米洞官田墨糾
衆為亂遣永順安撫副使梓材往招之賜高麗國王王
章功臣號改封瀋王改大承華普慶寺總管府為崇祥
監丙子立管領軍匠千戶所增國子生為三百員五月
甲申封諸王諤勒括為衛王乙未加尚書參知政事王
巖大司徒六月丁未朔詔太尉尚書右丞相托克托太
保尚書左丞相三寶努總治百司庶務並從尚書省奏
行戊申省上都留守司官七員以行中書左丞和爾多

卜丹為中書右丞己酉立上都中都等處銀冶提舉司
庚戌立規運都總管府領大崇恩福元寺錢糧置提舉
司資用庫大益倉隸之甲子以太子詹事庫春為中書
左丞集賢使領典醫監事戊辰遣使諸道審決重囚壬
申以西北諸王徹伯爾等來朝告祀太廟賜托克托三
寶努珠衣封三寶努為楚國公以常州路為分地秋七
月丙戌以循州大水賑之癸巳給親民長吏考功印歷
令監治官歲終驗其行蹟書而上之廉訪司御史臺尚

書禮部考校以為陞黜增尚書省客省使副各一員直
省舍人十四員立河南打捕鷹坊魚課都提舉司乙未
中都立光祿寺己亥禁權要商販挾聖旨懿旨令旨阻
礙會通河民船八月丁未以江浙行尚書省左丞相呼
喇珠遙授中書右丞相哩日並為御史大夫九月己卯
平伐蠻酋不老丁遣其姪與甥十人來降陞平伐等處
蠻夷軍民安撫司同知陳思誠為安撫使佩金虎符丙戌
帝還大都保己遙授平章政事壬辰皇太子言司徒劉

夔乘驛省親江南大擾平民二年不歸詔罷之壬寅
敕諸司官濫設者毋給月俸詔諭三寶努等去歲中書
省奏諸司官員遵大德十年定制濫者汰之今聞員冗
如故有不以聞而徑之任者有旨不奏而擅令之任及
之任者並逮捕之冬十月甲寅敕諭中外民戶託名
諸王妃主貴近臣僚規避差徭者俾充軍驛及築城中
都郡縣官不覺察者罷職封僧額琳沁策喇實為文國
公賜金印丁巳尚書省臣言宣徽院廩給日增儲待雖

廣亦不能給宜加分減帝曰比見後宮飲膳與朕無異
有是理耶其令博迪蘇興宣徽院官覈實分減之庚申
敕尚書事繁重諸司有才識明達者並從尚書省選
任樞密院事御史臺及諸有司毋輒奏用違者論罪辛
酉以皇太后受尊號赦天下大都上都中都較他郡供
給繁擾與免至大三年秋稅其餘至大二年以前民間
負欠差稅課程並行蠲免三寶努言省部官不肯勤恪
署事敕自今晨集暮退苟或怠弛不必與聞便宜罪之

其到任或一再月辭以病者杖罷不叙從之丁卯封諸
王舒巴勒子滿濟勒噶為克王壬申以瑪哈穆特丹達
為遙授右丞海外諸蕃宣慰使都元帥領海道運糧都
漕運萬戶府事以丞相特古勒德爾為陝西行御史臺
御史大夫詔諭大司農司勸課農桑十一月辛巳加托克
托為太師錄軍國重事封義國公壬午改大崇恩福元
寺規運總管府為隆禧院戊子以益都寧海等處連歲
饑罷鷹坊縱獵容米洞田墨來降授黃沙寨千戶以朱

清子虎張瑄子文龍往治海漕以所籍宅一區田百頃
給之城中都丙申有事於南郊尊太祖皇帝配享昊天
上帝己亥尚書省以武衛親軍都指揮使鄭阿爾斯蘭
與兄鄭榮祖段叔仁等圖為不軌置獄鞫之皆誣服叔
仁等十七人並就誅籍沒其家十二月甲辰朔以建大
崇恩福元寺遙授奇徹勒左丞策凌劉良叅知政事並
領行工部事

四年春正月癸酉朔帝不豫大赦庚辰崩于玉德殿年

三十一葬起輦谷諡曰仁惠宣孝皇帝廟號武宗國語
曰庫魯克皇帝

武宗至大四年

欽定續通志卷六十三